

李文忠公全集

奏稿

平定回疆方略卷一百一十五

四

李文忠公奏稿

卷之二十目錄

海船苦累變通辦理摺

同治十一年九月初五日

覆陳永定河保案片

同治十一年九月十七日

周馥留直片

同治十一年九月十七日

河工要缺變通酌補片

同治十一年九月十七日

鎮海輪船留津摺

同治十一年九月二十三日

預請撥款辦工代賑摺

同治十一年九月二十三日

奏報機器局經費摺

同治十一年九月二十三日
附清單

劉盛藻赴陝接統銘軍摺

同治十一年九月二十六日

潘鼎新留津彈壓片

同治十一年九月二十六日

請續撥張家口糧臺部餉摺

同治十一年十月二十二日

會議豫省蘆鹽加價改章摺

同治十一年十一月初三日

外省捐賑請獎片

同治十一年十一月初三日

奏留彭楚漢片

同治十一年十一月十二日

蘆課緩解片

同治十一年十一月十二日

截留京餉摺

同治十一年十一月十五日

試辦招商輪船摺

同治十一年十一月二十三日

軍營米糧請免釐稅片

同治十一年十一月二十三日

覆陳畿輔邊防摺

同治十一年十二月初五日

宋慶暫緩赴甘片

同治十一年十二月初五日

添撥永定河汛兵摺

同治十一年十二月初九日

奏保李興銳片

同治十一年十二月初九日

存棧練餉錢文全數發竣摺

同治十一年十二月初九日

文安天津大窪地蠲糧摺

同治十一年十二月十九日

練軍酌添洋鎗教習片

同治十一年十二月十九日

賑款請免報銷摺

附清單
同治十一年十二月十九日

盧溝橋南岸漫口工程摺

附清單
同治十一年十二月十九日

日本使臣來津換約摺

附清單
同治十一年十二月二十日

李文忠公奏稿卷二十

全集一之二十

桐城吳汝綸編錄

海船苦累變通辦理摺

同治十一年九月初五日

奏爲天津甯河兩縣海船代運奉天各州縣米豆苦累日甚擬請變通辦理恭摺仰祈

聖鑒事據天津道丁壽昌詳據天津甯河兩縣海船戶疊次具呈代運奉省米豆賠累不堪懇請設法拯救經該道飭據該兩縣查得乾隆年間奉省先有運京米豆七千餘石派天津縣代備海船駛赴牛莊裝運每百石發給水腳銀十四兩是爲牛運嗣奉省錦甯廣義四州縣徵收米豆四五萬石亦令天津縣代備海船分赴錦甯兩口裝運是爲初次兩運因津沽船戶差使過重又飭將兩運米豆由甯河縣海船分成裝運蓋從前津甯兩縣船多奉省船

少故有代運之舉該船戶所領水腳不敷向由津甯兩縣出海商船公攤津貼其時奉省米豆按時兌裝往返不過兩月並無守候之苦該兩縣海船共有七百隻上下生理頗旺津貼之費尙可勉強支持歷經照辦幸無貽誤乃自天津通商以後各國火輪夾板等船裝多駛速日漸增添內地海船生意多被佔奪十年之間折賣大半現存不過二百隻仍責以代運奉省米豆津貼愈少川費愈艱現在水腳照章改發六成實銀再除平飯等項所領有限而近年奉省州縣疲玩益甚倉無米豆又不及時采買雖經戶部及倉場疊次嚴催奏參補運尙辦不及正運更屬無期直省雇往各船守候經年並無開兌只得空回次年復去仍須停泊數月始有兌運者眾船一再往返坐食耗費綜計每運須賠銀二三萬兩殷實者八九蕩產中下之戶更不堪問若再代運必致現存之船全

數拆賣船戶既受大累運務終歸無著不能不亟籌變通之計目下海禁已開奉天各海口多有江浙直東貨船在彼販運連檣停泊迥非昔年船少可比上年錦口自雇張福順等船裝來粟米一千三百餘石是其明證應請嗣後此項米豆改歸奉省自行雇船運津何時米豆辦齊卽何時就近雇運其勢較便無須守候逾年又省來回水腳庶免貽累鄰封斂怨商民且東南各省漕糧皆係備船自運奉省應納之糧雇船運送亦分內之事直省備船代運本係通融辦法若商船尙多兌運又速斷不容稍有推諉今津甯船戶萬分困苦守候往返糜費過鉅勢不得不請歸該省自運以專責成並非取巧等情稟經該道核明詳

奏前來臣確加查察該船戶等實因生意大減運務屢賠鉅貲船隻日漸拆賣津貼無措苦累不堪礙難強爲勒催再令代運應請

准歸奉省自行雇船運津以紓鄰困而歸便捷所需水腳等項仍照舊章由直籌撥搭解若慮奉省海船不願承運並請仿照南省海運准其二八搭貨免納出口進口稅釐當更踴躍其米石到津後起剝運通一切事宜仍由天津道督同地方官妥爲經理接運所有奉省米豆海船擬變通辦理緣由理合恭摺具陳伏乞

皇太后

皇上聖鑒敕下戶部覈准施行謹
奏

覆陳永定河保案片

同治十一年九月十七日

再查永定河古稱難治雍正乾隆年間物力豐盛屢改下口僅獲苟安伏讀

高宗純皇帝觀永定河題詩注云目下固無事數十年後殊乏良策未免永念惕然等因欽此

聖哲先幾之明萬世臣子同深欽佩迄今百數十年下口益淤中洪益壅專恃夾隄束水本無善策又經兵燹彫殘之後部撥歲搶修額款疊次停減廢弛更甚上年異漲沖潰多處臣督飭在事各員窮數月之力補苴罅漏水旱各口倖均堵合又借賑款加培隄埵尙爲撙節覈實其勞苦出力者不得不據實保獎以資激勸本年七月十七日御史邊寶泉奏奉

上諭近聞永定河北岸隄工決口前據李鴻章奏保永定河合龍

出力人員摺內聲稱兩岸隄埵已培補堅厚何以又復潰決在工人員所司何事著卽查明參奏並著該部將前次保案卽行撤銷等因欽此其時蓋不知臣已查明漫口情形於七月十六日先行專摺參奏並自請議處未敢稍有回護也竊思河工修防各有汛地賞功罰過理貴持平本年七月閒北岸頭工下汛十七號水大漫隄成口係石景山同知王茂壘署北下汛縣丞唐照防守地段距上屆盧溝橋南岸石隄合龍工段計七十里之遙若以北岸防守不力之過而加於南岸經修完固之員一隅失事之咎而罰及通工保護隄段之人似不足以示勸懲況河工向例決口必須查參合龍卽須覈獎未聞有罰而無賞者上年兩次決口臣俱照例參辦合龍則臣亦照例請獎決口只責專汛合龍必資眾力歷辦成案皆然非自今日始也至石土各隄失修多年春閒僅能擇河

隄卑薄處加培高或三五尺寬或二三丈不等冀以塘護漾水因
北岸頭工十七號原有隄埵與加培處高低相平故未另行加工
不意七月初二夜水勢過猛大溜頂沖浪頭擡高數尺翻過隄頂
竟至無從措手實非已經加培處所偷減尺寸不能禦水之咎且
前次保案原係合龍出力並非因培隄另行請獎卽臣彙獎單內
均照尋常勞績核擬並無冒濫加優之處此次漫口仍調前保各
員熟手晝夜趲辦得以安速竣工其勞勩實未可泯合無仰懇
天恩准將撤銷之盧溝橋石隄五號尾大工合龍前後兩次保案
敕部更正注冊仍遵前

旨將彙獎清單覈議具奏以昭平允而勵將來出自逾格

鴻慈是否有當理合附片瀝陳伏乞

聖鑒訓示謹

奏

周馥留直片

同治十一年九月十七日

再查奏調河工差委江蘇候補知府周馥上年會辦盧溝橋石隄五號大工合龍案內經臣以該員耐勞忍苦辦事核實冀於直省河防有裨保請免補本班以道員改留直隸儘先補用奉

旨著照所請該部知道欽此嗣准吏部議覆仍令補交離省分發銀兩改留直隸俟補缺後以道員補用此次北岸頭工十七號漫口臣又奏明飭令該員馳往工次會商河道李朝儀趕緊搶堵正值秋汛水大經費支絀眾心疲懈勢難必底於成該員力任勞怨早夜經營多方鼓舞竟能剋期截事使河流及早復舊毋誤窮民種麥之期尤爲有裨時局據永定河道李朝儀稟稱該員周馥兩次來工經年督役果敢任事忠實性成凡危險喫緊之工得無疏失而能成者皆該員之力居多在尋常勞績百數十人中實爲異

常出力應懇奏請仍以道員留直補用等情臣查河務棘手之際得人爲難該員向辦工程深知款要近年派往永定河查勘籌辦歷練較熟操守廉潔足式浮靡是以臣於本年三月閒附片據實懇

恩留直以道員補用以爲任事認真者勸前案現經另請更正部議既准俟補缺後以道員用今屆搶堵險工安速藏事實賴其力雖部章尋常勞績不准免補本班惟河工熟諳機宜撙節款項者殊不易得亟須儲才備用相應籲懇

特恩將補用知府周馥仍照前保免補本班以道員留直儘先補用俾資臂助嗣後不得援以爲例伏乞

聖鑒訓示施行謹附片具

奏

河工要缺變通酌補片

同治十一年九月十七日

再查河工要缺例歸外補永定河五廳二十一汛皆按資格由藩司河道會詳題咨序補向未准有酌補之案惟是人才有強弱工段分平險嘗有積資累考之員而不勝煩劇經明行修之士而未諳工程乃爲例議所拘未便棄而勿用則臨事必至貽誤今欲講求實濟須才與事稱酌量器使可漸收效查地方州縣有實係人地相宜例准聲明請補而河工要缺尤關係百姓安危應擇其最險之工如永定河南岸同知南上汛霸州州同南下汛宛平縣縣丞南二工良鄉縣縣丞南四工固安縣縣丞南七工東安縣主簿北岸同知北下汛宛平縣縣丞北三工涿州州判等缺據該河道李朝儀稟稱擬請不拘序補章程或由現任升調或由候補試用內通融揀補必得熟諳河務能耐勞苦人員庶用其所長而臂指

可恃以上各缺應均改爲酌補如數十年後或變險爲平及他汛
平工或又變爲險由司道查明詳奏核請更改其餘次險工段員
缺仍照例核辦當此河務廢弛已久有志者徒勞而不能驟見功
效心力漸灰其旅進旅退者又以害多利少而不能振作非於進
賢之途略寬文法使其砥勵斷難日有起色所有河工險要員缺
擬請隨時變通酌補緣由謹附片具陳伏乞

聖鑒敕部覈准施行謹
奏